



Isnin, November 28, 2016

MENGENAI KAMI PENYELIDIKAN AKADEMIK JARINGAN ANTARABANGSA KEHIDUPAN KAMPUS PERKHIDMATAN

| A- | A | A+ | EN | RU | AR

BERITA »**45 atlet dari UPM terima Insentif Kecemerlangan Atlet**

Oleh: Azman Zakaria
Foto: Marina Ismail

SERDANG, 16 Nov: Seramai 45 atlet dari Universiti Putra Malaysia (UPM) yang mewakili negara pada Sukan Universiti ASEAN di Singapura, Julai lalu menerima insentif daripada UPM, baru-baru ini.

Turut menerima insentif pada majlis itu ialah atlet menembak negara dari UPM, Jonathan Wong Guanjie yang beraksi di Sukan Olimpik Rio 2016 dan Penolong Pegawai Belia dan Sukan, Pusat Sukan UPM, Mohamad Azwar Bakar@Ibrahim, yang beraksi dalam acara ping pong pada Sukan Paralimpik Rio.

Dua lagi atlet UPM yang mewakili negara pada Sukan Olimpik Rio – Cheong Jun Hoong (acara terjun) dan Zaidatul Husniah Zulkifli (olahraga) – sudah menerima insentif pada majlis sebelum ini.

Insentif berupa wang tunai itu disampaikan oleh Naib Canselor UPM, Prof. Datin Paduka Dr Aini Ideris pada Majlis Penyampaian Insentif Kecemerlangan Atlet Sukan UPM di sini.

Turut hadir Timbalan Naib Canselor (Akademik dan Antarabangsa), Prof. Datuk Dr. Mad Nasir Shamsudin; Timbalan Naib Canselor (Hal Ehwal Pelajar dan Alumni), Prof. Datuk Dr. Mohammad Shatar Sabran; Timbalan Naib Canselor (Penyelidikan dan Inovasi), Prof. Datuk Dr. Mohd Azmi Mohd Lila dan Ketua Pusat Sukan UPM, Dr Hanafiah Ayub.

Antara atlet yang menerima insentif pada majlis itu ialah Zaidatul Husniah (olahraga), Ahmad Luth Hamizan (olahraga), Natasha Ezra Abu Bakar (lawan pedang), Mohd Firdaus Ishak (memanah), Nur Atiqah Azizi (memanah) dan Saritha Cham Nong (memanah) yang masing-masing memenangi pingat emas pada Sukan Universiti ASEAN Singapura dari 8 hingga 21 Julai lalu.



Ketika berucap, Prof. Datin Paduka Dr. Aini berkata, UPM mewujudkan Skim Insentif Kemenangan Atlet bertujuan memberi dorongan dan suntikan motivasi kepada atlet UPM.

Melalui skim itu, atlet yang berjaya memenangi pingat untuk negara layak menerima insentif. Nilai insentif berdasarkan taraf kejohanan dan pencapaian seperti Sukan Olimpik, Sukan Paralimpik, Sukan Komanwel, Sukan Asia, Sukan Sea dan Sukan Para ASEAN.

Katanya, melalui insentif itu, UPM juga meluluskan pemberian geran mobiliti akademik dan pengecualian yuran pengajian bagi semester semasa dan semester berikutnya.

Beliau berharap insentif itu menjadi satu motivasi luaran dan galakan yang berkesan bagi atlet mencapai kemenangan yang lebih besar dalam kejohanan dunia.

"Untuk terus cemerlang, kita tidak boleh berhenti dan berpuas hati dengan pencapaian sedia ada."

"Kejayaan pada masa sekarang sepatutnya menjadi penanda aras untuk para atlet mencipta lebih kejayaan di masa akan datang," katanya. - UPM